

# Plan di Accion di Partido POR

pa Mitiga e Impacto Financiero-Economico di e Pandemia di Coronavirus

## 1. Pregunta central

E pregunta central di e Plan di Accion aki ta lo siguiente:

*Cua ta e pasonan cu mester tuma a corto plaso pa por mitiga mas tanto posibel e impacto financiero-economico di e pandemia di coronavirus na nos pais?*

## 2. Sub-preguntanan

For di e pregunta aki por destila e siguiente sub-preguntanan:

1. Cua ta e pasonan cu Gobierno mester tuma a corto plaso pa reduci su gastonan operacional y aumenta su entradanan cu e meta pa mitiga e impacto di e crisis riba su posicion di likides?
2. Cua ta e pasonan cu mester tuma a corto plaso pa salvaguardia mas tanto cupo di trabou cu ta posibel den sector priva y cu e trahadonan cu mantene nan cupo di trabou lo tin un nivel di entrada cu ta yega mas tanto posibel nan salario normal di pre-coronavirus?
3. Cua ta e pasonan cu mester tuma a corto plaso pa percura cu esnan cu perde nan trabou den sector priva por tin un entrada cu ta yega mas cerca cu ta posibel na e nivel si subsistencia (“bestaansminimum”)?
4. Cua ta e pasonan cu mester tuma a corto plaso pa trece alivio pa e trahadonan cu bay atras den entrada of esnan cu perde trabou?
5. Cua ta e pasonan cu mester tuma a corto plaso pa fortifica of alivia suficientemente e posicion di likides (cashflow) di companianan priva pa nan por cumpli mas tanto posibel cu nan gastonan di personal y otro gastonan operacional pa salvaguardia sobrevivencia di mas tanto compania priva posibel?
6. Cua ta e pasonan cu mester tuma pa segura cu, anticipando riba e fin di e crisis di coronavirus of unabes cu e crisis aki yega su fin, nos pais lo recupera economicamente mas pronto cu ta posibel na e nivel di pre-coronavirus?

## 3. Puntonan di salida

E Plan di Accion ta basa riba e siguiente puntonan di salida:

1. Pa nos pais por enfrenta y supera e crisis actual e ta rekeri cu nos tur mester haci sacrificio, esaki ta conta pa Gobierno, trahadonan di sector publico, dunadonan di trabou y trahadonan di sector priva y comunidad en general.
2. Solamente si nos tur traha hunto, schouder cu schouder, cu tur nanishi den mesun direccion, nos pais por logra mitiga e impacto financiero-economico di e pandemia di coronavirus y recupera mas liher posibel cu menos daño posibel for di e crisis.
3. No ta tur empresa lo sinti e impacto di e crisis mesun fuerte of ta den un mesun situacion financiero pa por deal cu ne. E sector turistico y e sectornan cu ta depende grandemente di turismo lo ta esunnan cu lo experencia un impacto mas fuerte pa loke ta nan entradanan. Ademá tin empresanan cu tin un mihor posicion di likides cu otro.

4. E pasonan cu Gobierno mester tuma pa aumenta su entrada no mag di pone un peso adicional riba comunidad (trahadonan y dunadonan di trabou).
5. E pasonan cu mester tuma mester ta ehecutabel (“uitvoerbaar”) riba termino corto, esta entrante 1 mei 2020 of riba un fecha mas cerca posibel di esaki. Esaki ta nifica e.o. cu nan mester ta simpel pa prepara y ehecuta, cu menos red tape posibel. E ta nifica tambe cu cumplimento debido cu nan di parti di ciudadanonan y empresanan mester ta facilmente controlabel di parti di departamentonan gubernamental pa evita mal uso y hasta fraude.
6. E crisis ta temporal, pues e pasonan pa mitiga su impacto tambe mester ta temporal. Solamente si ta strictamente necesario pa mitiga efectonan financiero-economico cu ta persisti te cu despues cu e pandemia di coronavirus termina, lo por prolonga esakinan pa un periodo defini.
7. Pa algun di e pasonan ta conta cu nan por wordo implementa mediante cambio di maneho, pero tin algun di nan cu ta rekeri un base legal den forma di p.e. un landsverordening. Punto di salida ta cu Gobierno lo pidi Staten pa bay di acuerdo cu nan implementacion pendiente formalizacion posterior (achteraf) di esakinan door di Staten.
8. Durante e simannan y lunanan nos danti lo mester keda monitor di cerca e desaroyonan y efectonan di e pasonan cu mester tuma pa asina por “stuur bij” na tempo unda y ora esaki ta necesario.

#### 4. Suposicionnan

E Plan di Accion ta basa riba e siguiente suposicionnan (“assumptions”):

1. Pa nos por logra convence Gobierno di Reino (Hulanda) pa a base di artikkel 36 di Statuut contribui cu y/of facilita financiamiento di un plan financiero-economico pa mitiga e impacto di e pandemia di coronavirus, e mester ta un plan cu 1) ta financieramente factibel y 2) cu ta demostra cu nos pais ta asumi su responsabilidad y cu henter nos comunidad ta dispuesto pa haci e sacrificionan necesario.
2. Aunke ningun hende por predecir cu certesa absoluto ki dia nos pais lo surpasa e crisis, por usa 3 posibel escenario cu por yuda planea pa futuro.
  - Scenario 1: esaki ta e “best case scenario” y ta encera cu entrante 1 juni 2020 e pandemia di coronavirus lo yega su fin y cu gradualmente den 4 luna di tempo entradanan for di turismo (cu ta genera 90% di nos GDP) lo crece te na e nivel di pre-coronavirus (juni 25%, juli 50%, augustus 75% y september 100%).
  - Scenario 2: esaki ta e “most probable scenario” y ta encera cu entrante 1 augustus 2020 e pandemia di coronavirus lo yega su fin y cu gradualmente den 4 luna di tempo entradanan for di turismo lo crece te na e nivel di pre-coronavirus (augustus 25%, september 50%, october 75% y november 100%).
  - Scenario 3: esaki ta e “worst case scenario” y ta encera cu entrante 1 september 2020 e pandemia di coronavirus lo yega su fin y cu gradualmente den 4 luna di tempo entradanan for di turismo lo crece te na e nivel di pre-coronavirus (september 25%, october 50%, november 75% y december 100%).
3. Scenario 2 ta esun mas probabel y e suposicion aki ta basa riba lo siguiente:
  - Experiencia na China ta indica cu e ta tuma por lo menos 3 pa 4 luna pa por contene e coronavirus despues di a implementa medidanan di “lockdown” den e di 3er siman di januari 2020.
  - Den luna di maart ultimo (6 pa 8 siman despues di China) practicamente tur pais (incluyendo Aruba) a cuminsa implementa medidanan similar na esunnan di China (avondklok, shelter in place y restriccion di biahamiento).

- Entre tanto comunidad internacional a realiza su mes cu solamente despues cu keda suficientemente proba cu a vence e coronavirus paden di nan fronteranan nacional, ta recomendabel pa gobiernonan cuminsa considera pa anula e medidanan menciona.
- Den linea cu e strategia aki, riba nivel mundial gobiernonan lo mantene e prohibicion di biahamento” (“travel ban”) te na e momento cu no tin riesgo mas di un 2do ola di casonan di coronavirus importa. E expectativa ta cu te despues cu keda suficientemente proba cu a vence e coronavirus riba nivel mundial, e prohibicion di biahamento lo wordo anula. Pesey mes ta razonabel pa asumi cu e medida aki lo ta e ultimo pa wordo anula.
- Na e momentonan aki Merca ta e epicentro di e pandemia di coronavirus y, teniendo cuenta cu e actual prohibicion di biahamento internacional, ta razonabel pa asumi cu Merca lo ta e ultimo epicentro. Consecuentemente ta importante pa tin un bista pa ki tempo e coronavirus lo por keda venci na Merca.
- Basa riba un analisis di 2 april 2020 di “University of Washington’s Institute for Health Metrics and Evaluation, investigadornan por a predecir 1) e “peak outbreak” di e coronavirus pa cada estado Mericano si mantene distanciamiento social y 2) con largo e coronavirus outbreak lo dura / te ki dia e lo yega su fin. Pa motibo cu no ta na tur estado e nivel di infeccion ta mesun severo, e fecha di peak ta diferencia pa estado y e lo ta entre 8 april 2020 y 22 mei 2020. A usa e definicion cientifico – na momento cu e cantidad di morto baha bou di 0.3 pa miyon habitante – como indicador di e fin di e pandemia pa cada estado. Nan modelo ta muestra cu pa mas tarda 14 juli 2020 e pandemia di coronavirus lo termina den tur estado Mericano.
- E datonan y resultadonan menciona aki riba ta sostene e suposicion cu e prohibicion di biahamento internacional lo wordo anula mundialmente entrante 1 augustus 2020. Entrante e fecha aki, buelonan di pasahero pa y for di Aruba lo inicia bek.
- Manera menciona anteriormente, ta asumi cu lo mas probabel ta cu entradanan for di turismo lo recupera gradualmente den 4 luna di tempo entrante 1 augustus 2020. Despues cu e pandemia di coronavirus yega su fin riba nivel mundial, lo tin biaheronan internacional cu lo ta cuateloso pa reanuda nan plannan di biahe pa motibo di miedo pa wordo contagia cu e virus of pa motibonan economico, mientras cu lo tin biaheronan internacional tambe cu lo ta ansioso pa reanuda nan plannan di biahe.

## 5. Plan di Accion

### 5.1 Mitiga impacto di e crisis riba posicion di likides di Gobierno

*Cua ta e pasonan cu Gobierno mester tuma a corto plaso pa reduci su gastonan operacional y aumenta su entradanan cu e meta pa mitiga e impacto di e crisis riba su posicion di likides?*

1. Introduccion di un pakete di reduccion di gastonan operacional di sector publico di Afl. 100 miyon pa loke ta resto di aña 2020. Esaki lo mester wordo busca principalmente den e categorianan di gasto cu ta mas halto, esta gastonan di personal, goederen en diensten y subsidio. Pa loke ta gastonan di personal, ta pensa riba freezementu di pago di vakantie-uitkering, reparatietoelag y najaarspremie (gelijk bedrag). Esaki lo mester conta tanto pa ambtenaarnan y arbeidscontractanten cu ta traha directamente pa Gobierno, pero tambe pa esnan cu ta traha na instancianan cu ta ricibi subsidio di salario di Gobierno. Ta papia pa su mes cu NV-nan di Gobierno (manera p.e. RDA, WEB, Elmar, Setar, AAA, APA y ANSA) y “rechtspersonen sui generis” (manera p.e. SVB, AZV, Serlimar, ATA y Banco Central) lo mester sigui mas tanto posibel e linea di maneho di Gobierno pa reduci gastonan operacional.

2. Bende shares di companianan di utilidad (WEB, Elmar y Setar) cu fondonan di pensioen local. Esaki lo mester genera Afl. 100 milyon na entrada pa Gobierno.
3. Reduci tarifa riba pago di dividendo na shareholders di companianan local cu 50% pa un periodo di 3 luna. E lo tin un efecto positivo no solamente pa caha di Gobierno y riba actividadnan economico pero tambe riba nos reserva di divisa si ta trata di “opgepote winstreserves” deposita den exterior.

Cu e prome 2 pasonan aki so Gobierno lo genera Afl. 200 milyon na likides, locual lo reduci substancialmente e necesidad pa Gobierno financia su plan financiero-economico pa mitiga e impacto di e pandemia di coronavirus mediante schenking di Hulanda y/of prestamonan riba mercado internacional di capital.

## 5.2 Salvaguardia cupo di trabou y entrada pa trahadonan di sector priva

*Cua ta e pasonan cu mester tuma a corto plaso pa salvaguardia mas tanto cupo di trabou cu ta posibel den sector priva y cu e trahadonan cu mantene nan cupo di trabou lo tin un nivel di entrada cu ta yega mas tanto posibel nan salario normal di pre-coronavirus?*

1. Director di Departamento di Labor no lo aproba ningun peticion pa retiro di trahado pa motibonan comercial (“bedrijfseconomische redenen”) cu a/lo wordo entrega entre 1 april 2020 te cu 30 juni 2020.
2. Entrante 1 mei 2020 ta introduci un areglo special di Contribucion Salarial pa Companianan Priva (CSCP):
  - a) Gobierno lo financia e areglo aki mediante schenking y/of soft loans/ interest-only rollover until recovery loans di Hulanda.
  - b) Lo encarga Sociale Verzekeringsbank (SVB) cu maneho y administracion di e areglo aki.
  - c) Entrante 1 mei 2020 e dunado di trabou por haci un peticion pa bin na remarke pa contribucion pa un periodo di 1, 2 of 3 luna (april-juni 2020). Pues pa luna di april e areglo lo wordo aplica cu forsa retro-activo te cu 1 april 2020.
  - d) Pa e por bin na remarke e dunado di trabou mester demostra cu a consecuencia di e crisis di coronavirus su benta (omzet) a baha cu 50% of mas.
  - e) E contribucion ta Afl. 950,= pa luna pa cada trahado.
  - f) E compania mester ta inscribi na Kamer van Koophandel (KvK) pa e por haci un peticion.
  - g) E trahado mester ta inscribi na SVB como trahado di e compania pa e por cay bou di e areglo di contribucion.
  - h) E dunado di trabou lo ricibi un contesta dentro di 10 dia di trabou despues cu a haci e peticion, a menos cu tin motibonan hustifica cu a trece tardansa.
  - i) Si e peticion wordo honra, e dunado di trabou 1) no mag di kita ningun trahado pa motibonan comercial pa e periodo cu ta ricibi e contribucion, 2) mester paga tur trahado por lo menos 25% di nan salario y 3) mester informa su trahadonan di esaki.
  - j) E dunado di trabou mag usa e contribucion solamente pa paga salario di su trahadonan y pa nada otro.
  - k) E dunado di trabou mester percura pa un administracion controlabel cu ta contene tur informacion relevante.
  - l) Dentro di 1 luna despues cu e periodo di contribucion termina, e dunado di trabou mester entrega 1) un opgave definitivo di e caida di benta, 2) prueba cu e contribucion a wordo usa solamente pa pago di salario y 3) un declaracion di accountant.

- m) Si a base di e documentacion menciona den punto l resulta cu a ricibi contribucion di mas, lo cobra esaki y si resulta cu a ricibi di menos, lo paga esaki.
3. Entrante 1 mei 2020 ta introduci un “Payroll Crisis Fund” (PCF):
    - a) Gobierno lo percira pa haya financiamiento pa e fondo (schenking y/of soft loans di Hulanda).
    - b) Lo encarga Aruban Investment Bank (AIB) cu maneho y administracion di e fondo aki.
    - c) Companianan priva cu ta desea likides adicional (riba e contribucion menciona bou di punto 2e) pa cumpli cu nan gastonan di personal of cu no ta desea di haci uso di e areglo di contribucion menciona bou di punto 2, por haci peticion pa un “soft loan” na e fondo pa cubri parti di nan gastonan di personal pa e mesun periodo menciona bou di 2c.
    - d) E compania por haci peticion pa un fianza di minimo Afl. 10.000,= te na un maximo di Afl. 100.000,=.
    - e) E reglanan y condicionnan menciona bou di puntonan 2d, 2f, 2h, 2i, 2j, 2k y 2l ta conta igualmente pa e areglo di PCF.
    - f) E compania lo mester cuminsa paga e fianza bek entrante 1 januari 2021 y tin 8 luna pa caba di paga.
  4. Flexibilisa temporalmente nos leynan laboral pa asina 1) dunadonan di trabou por haci uso mas eficiente di nan trahadonan y 2) mehora funcionamiento di nos mercado laboral. Ta pensando p.e. riba flexibilidad pa reduci e cantidad di oranan di trabou y salario di e trahado.

### 5.3 Percira cu esnan cu perde trabou den sector priva por tin un entrada

*Cua ta e pasonan cu mester tuma a corto plaso pa percira cu esnan cu perde nan trabou den sector priva por tin un entrada cu ta yega mas cerca cu ta posibel na e nivel si subsistencia (“bestaansminimum”)?*

Gobierno entre tanto a introduci e Fondo di Asistencia Social di Emergencia (FASE) pa yuda nos conciudadananon cu perde trabou a consecuencia di e crisis di coronavirus. Lo duna asistencia te cu Afl. 950 pa luna pa 3 luna largo.

Aunke e Plan di Accion su enfoque principal ta pa evita mas tanto posibel cu trahadonan ta perde trabou a consecuencia di e crisis di coronavirus, e realidad ta cu probabelmene un grupo relativamente grandi di trahadonan ta bay perde nan trabou. Ta dificil pa predecir esaki cu exactitud, pero cu implementacion di e Plan di Accion ta calcula cu e cantidad di trahadonan cu lo perde trabou lo ta alrededor di 10.000-15.000, pues mucho mas abou cu e cifra di 25.000 cu a wordo menciona dia a anuncia e helpdesk di FASE.

### 5.4 Trece alivio pa comunidad

*Cua ta e pasonan cu mester tuma a corto plaso pa trece alivio pa e trahadonan cu bay atras den entrada of esnan cu perde trabou?*

1. Ta introduci entrante 1 mei 2020 y pa 3 luna largo un periodo di gracia pa tur tipo di debe (impuesto, primanan social y di pensioen, huur, hypotheek, commercial loan, personal loan, lease, seguro, etc) y sin extra interes. Durante e periodo aki creditornan no lo cobra nan debedoran. Despues di e periodo aki partidonan mester yega na un areglo di pago cu ta rasonabel y husto pa ambos partido.
2. Companianan di utilidad WEB, Elmar y Setar ta introduci entrante 1 mei 2020 y pa 3 luna tarifanan mensual maximo cu ta tene cuenta cu e situacion actual di crisis:
  - WEB: awa Afl. 75,=.
  - Elmar: coriente Afl. 175,=.
  - Setar: cable/internet Afl. 50,=.

- Pakete total Afl. 300,= pa cas;
- Si na un cas usa menos cu e tarifanan maximo, lo paga pa loke a usa.
- Si constata cu e uso di awa y/of coriente a aumenta na un cas, compara cu e uso promedio durante ultimo 6 lunanan prome cu 1 mei 2020, e ora lo mester paga e diferencia. Esaki ta pa evita cu ta bay haci mal uso di e tarifanan temporal.

### 5.5 Salvaguardia sobrevivencia di companianan priva

*Cua ta e pasonan cu mester tuma a corto plaso pa fortifica of alivia suficientemente e posicion di likides (cashflow) di companianan priva pa nan por cumpli mas tanto posibel cu nan gastonan di personal y otro gastonan operacional pa salvaguardia sobrevivencia di mas tanto compania priva posibel?*

1. Pa loke ta e pasonan pa fortifica posicion di likides pa por cumpli mas tanto posibel cu gastonan di personal, ta referi na paragraf 5.2 puntonan 2 y 3.
2. Relaciona cu e pasonan pa trece alivio pa comunidad, mester menciona cu companianan priva tambe lo probecha di e periodo di gracia menciona den paragraf 5.4 punto 1, mirando cu e ta conta tambe pa debenan entre y di companianan.
3. Pa companianan priva e tarifanan comercial di e 3 companianan di utilidad menciona den paragraf 5.4 lo wordo reduci cu 50% entrante 1 mei y pa 3 luna.
4. Entrante 1 mei 2020 ta introduci un areglo di garantia parcial di Gobierno pa fianza den forma di “overbruggingskrediet” na empresanan cu ta haya nan mes den problema di likides pa motibo di e crisis di coronavirus. E areglo lo ta similar na esun cu ta existi na Hulanda pa hopi aña caba y cu recientemente a wordo amplia en conexion cu e crisis, esta e “verruimde borgstellingsregeling midden- en kleinbedrijf kredieten (BMKB)”:
  - a) Gobierno mediante Fondo di Garantia pa Vivienda ta para garantia pa 50% di e suma cu e compania ta fia for di un banco comercial local.
  - b) Pa e compania por bin na remarke e mester demostra cu a consecuencia di e crisis di coronavirus su benta (omzet) a baha cu 50% of mas.
  - c) E compania tin maximo 2 aña pa paga bek.
  - d) E suma di fianza minimo ta Afl. 25.000,= y maximo Afl. 500.000,=.
  - e) Pa un compania por bin na remarke pa un prestamo di entre Afl. 250.000,= y Afl. 500.000,=, e compania mester tin por lo menos 100 trahado den servicio.
  - f) En principio tur compania priva cu ta legalmente estableci na Aruba y cu ta cumpli cu e condicion menciona bou di punto 3b por bin na remarke, no ta exclui ningun sector of tipo di negoshi.
  - g) Pa e parti di e financiamiento cu no ta cubri door di e garantia di Gobierno, e compania mester tin otro siguridadnan (p.e. hypotheek, propiedad, debitornan y inventario).
5. Temporalmente mester flexibilisa reglanan di Banco Central di Aruba (BCA):
  - a) E enfoke di e maneho di BCA na e momentonan aki mester ta con pa stimula y facilita otorgamento di prestamonan comercial door di nos banconan comercial na un interes mas abou cu ta posibel. Ta pensando riba un interes di entre ½% y 1%.
  - b) Ta probabel cu e cantidad di companianan y personanan cu ta bay cay atras cu nan pago of cu no por paga nan debe na banco ta bay aumenta y BCA mester muestra comprension pa e situacion di crisis y ta mas tolerante cu normal.
  - c) Mester elimina redtape y haci mas facil y atractivo pa companianan local por haci prestamonan den exterior.
  - d) Mester elimina red tape y haci mas facil y atractivo pa residentenan y companianan local por transferi likides cu nan tin den exterior pa Aruba.

- e) Un otro areglo cu BCA lo mester reconsidera ta e “B9 regeling”. Un banco local no por fia dollars for di un banco den exterior y usa e suma localmente. E dollar mester wordo produci na Aruba.

## 5.6 Stimula recuperacion economico

*Cua ta e pasonan cu mester tuma pa segura cu, anticipando riba e fin di e crisis di coronavirus of unabes cu e crisis aki yega su fin, nos pais lo recupera economicamente mas pronto cu ta posibel na e nivel di pre-coronavirus?*

1. Unabes cu tin suficiente prueba cu e coronavirus a keda venci dentro di nos fronteranan, un di e prome pasonan cu mester wordo tuma ta pa bolbe permiti actividadnan di construccion, manteniendo logicamente e reglanan di distanciamiento social. Por ehempel, e sector di timeshare hotels tin suficiente likides y diferente proyectonan di mantencion para na e momentonan aki. Un otro ehempel ta cu tin un gran cantidad di hende cu ta wardando pa cuminsa of continua cu construccion di nan cas.
2. Aruba Tourism Authority (ATA) mester pone un suma adicional disponibel di por lo menos Afl. 20 miyon pa por mercadea y promociona nos pais den un forma agresivo den nos mercadonan tradicional y tambe mercadonan nobo.
3. Introduci un tipo di “Crisis en Herstelwet” pa elimina red tape y agilisa procesonan di tuma desishon (por tuma ehempel na e esencia di e ley di Hulanda di 2011 cu a yuda NL restaura di e financial meltdown di 2008).
4. Nos sector hotelero mester ta cuateloso y aumenta gradualmente nos “average daily room rate” (ADR) na e nivel di pre-coronavirus pa evita cu Aruba ta prijs su mes for di mercado.
5. Den añanan 80, despues di ciere di LAGO, recuperacion economico tawata basa riba inversionnan priva den expansion acelera di cantidad di camber di hotel. E biaha aki e strategia di Gobierno mester ta pa den prome instante stimula inversionnan priva dirigi riba aumento di productividad y mehoracion di nos infraestructura turistico cu e meta pa aumenta calidad di producto “Aruba”. Y segun nos ta recuperando di e crisis lo mester duna mas atencion na inovacion y diversificacion (green economy, circular economy, digital economy, knowledge economy y local food security).
6. Den e maneho di Gobierno pa stimula inversionnan priva, Gobierno lo mester traha un plan pa mehora nos clima di inversion y den e cuadro aki considera facilidadnan fiscal temporal pa atrae inversionistanan internacional cu financiamento for di exterior. Esaki lo tin un impacto grandi riba crecimiento economico y nos reserva di divisa.
7. Pa loke ta inversionnan publico, e suma anuncia di Afl. 20 miyon pa año 2020 ta mucho abou. Ta propone pa aumenta e suma te na Afl. 50 miyon. E suma aki por wordo financia parcialmente of completamente cu e likides adicional cu e pasonan menciona den paragraf 5.1 ta genera pa Gobierno. E enfoke mester ta riba inversionnan publico cu un spin-off effect grandi riba actividadnan economico pa asina e inversionnan aki contribui tambe na stimula confiansa di inversionistanan priva (local y internacional) den nos economia.
8. E areglo di garantia menciona den paragraf 5.5 punto 4 mester wordo prolonga y ahusta despues di e crisis cu e meta specifico pa sostene e proceso di recuperacion economico. Enbes di yuda empresanan cu problemanan di likides, e meta principal lo bira pa promove inversionnan productivo y inovativo.
9. Si resulta cu e proceso di recuperacion no ta bay cu e speed desea y cu desempleo ta keda halto, lo por considera pa pone un paro riba prolongacion di werkvergunningen.